


## ALAHADY 2 KAREMY - TAONA D2019



### « Raha mbola nivavaka Izy, dia niova toetra ny Tarehiny » (Lk. 9: 29)

Ry Kristianina havana, tena anatin'ny karemy isika ary nasongandintsika tamin'ny Alahady voalohany Karemy lasa teo fa Ady sady Dia ny fiainana izay hitondra antsika amin'ny fankalazana an'i Kristy nitsangan-ko velona. Ady amin'ny ratsy hampivelatra antsika ka hahatonga ho Zanak'Andriamanitra miaraka amin'I Kristy nandresy ny ratsy. Sady Dia mankany amin'ny fiainana tsara misy an'Andriamanitra . Ady amin'ny fahotana araka ny voalazan'i Papa amin'izao karemy izao fa ny fahotana no mahatonga antsika tsy mivelona ny maha zanak'Andriamanitra antsika ary manapotika ny fifandraisantsika amin'Andriamanitra ka noho izany potika ny tontolom-pinoana Hitantsika izany amintsika amin'ireny fifangaroan'ny fiainantsika ireny.

Vakiteny I : Jen. 15, 5-12. 17-18  
Tononkira : Salamo 26  
Vakiteny II : Fil. 3, 17 — 4, 1  
Evanjely : Lk. 9, 28b-36

Noho ny fahotana dia potika ny tontolom-piainantsika. Potika ny fiainantsika samy mpiara-belona eo anivon'ny fiaraha-monina vokatry ny fahotana satria tsy matohitra ny fakam-panahy maro samihafa isika. Marihina anefa fa i Jesoa efa niady izany fakam-panahy izany tany an'efitra fantantsika tsara izany.

Ny tena nasongandin'i Papa amin'ny hafatra nataony dia ny fahapotehan'ny tontolo iainantsika noho ny fahotana, toy izay hiezaka isika hikolokolo na “hi s'adapter” amin'ny tontolo iainana dia terentsika izany noho ny fakam-panahy sy fahotana ka manaraka ireo filàna sy ny sitrapontsika isika ary hitantsika ny vokatr'izany eo amin'ny tontolo iainantsika izay potika. Ka ny Ady sady Dia ataontsika amin'izao karemy izao no hitondra antsika amin'ny fiainam-baovao entin'ny Paka. Raha miara-maty amin'i Kristy amin'ny fahotana isika dia hiara-hitsangana aminy ka zary zava-boahary vaovao, izany tokoa no antenaintsika. Amin'izao Alahady faharoan'ny Karemy izao izay mampisongadina fa ny làlan'ny hazo fijaliana ny fiainana Ady sy Dia izay niainan'I Jesoa koa ary tsy

mandeha ho azy. Izany indrindra no nitondran'ny Jesoa ireo mpianany nivavaka teny antondrombohitra izay toerana niovany tarehy mba hampiharihary ny voninahitr'Andriamanitra mihoatra ny famirapiratana rehetra izay mahalevona ny haratsiana sy ny fijaliana rehetra. Raha miombona amin'ny Tompo isika dia miova ny fiainantsika ary io fiovana tarehy io no ilay zava-boahary vaovao, izany no antenaintsika amin'izao Paka izay hidirantsika izao. Rehefa niova tarehy i Jesoa dia tonga fotsy manjopika ny endriny ary dia voalaza fa io fahazavana manjopiaka hita tamin'i Jesoa io no manambara ny maha Andriamanitra azy. Izany koa no andrasantsika amin'izao fiomanana ny fankalazana ny Paka izao, hanavaozantsika ny toky tamin'ny batemy satria io no mahatonga antsika ho zanak'Andriamanitra ka handraisantsika ny fahazavana manjopiaka ka manova ny fiainantsika manontolo. Ny fahitana an'izany no nahatonga an'ireo apôstôly voalaza ao amin'ny evanjely izay novakiansika androany nilaza fa *“Mahafinaritra ny mitoetra aty ka handeha hanangana lay telo”* hoy i Piera.

Rehefa tena miombona amin'i Jesoa isika dia lasa Eglizy Olona Velona tokoa ka noho izany dia tsara ny mitoetra sy miombona amin'i Jesoa mba ho zary mpanorina Eglizy Tranon'Andriamanitra isika, izany no averimberin'i Papa : *“raha miova tokoa ny fontsika dia izany ny fibebahana”*, ny tranobe iombonantsika ny maison commune dia ho kolokolointsika tsara satria mamelona antsika. Ho tanteraka izany fikolokoloana izany raha miombona amin'i Kristy isika ka miara-misalahy mampandroso ny fiainantsika mba ho fiainana hisy an'Andriamanitra, fiainana mitondra antsika amin'ny fampandrosoana ny olona manontolo. Ambaran'ny Evanjely amintsika ny làlan-kombana amin'izany *“Inty ny zanako malalako, henoy izy”*.

Ry Kristianina hava malala, amin'izao Karemy Ady sy Dia izao ny làlan-kombana dia ny fandraisana ny tenin'Andriamanitra, ny fihainoantsika ny fampianarana atao amintsika; Katolika aho ka mandalina ny finoako. Izao ny vanim-potoana handalinantsika ny finoana, tsy hoe finoana an-kandrina fa katolika aho ka mijoro amin'ny finoako, katolika aho ka manompo, katolika mandray antanana, katolika ka manakalaza ny finoako. Ataontsika, ivelomantsika amin'izao karemy izao araka ny nampianarina antsika tamin'ny Alarobian'ny lavenona ka hirosoantsika amin'ny asa famindrampo izay manambara fa mihaino an'i Jesoa isika ary tsy maintsy manapa-kevitra amin'ny hivelomantsika ny maha Katolika antsika izany ka hiroso amin'ny vaomieran'ny asa isika. Katolika aho ka mankalaza ny finoako. Izany indrindra no tokony hiverenantsika amin'Andriamanitra amin'ny alalan'ny sakramentan'ny fampihavanana, izay ambaran'ny vakiteny voalohany henontsika androany, Andriamanitra manao fanekem-pihavanana tamin'i Abrahama, izany no andrandraintsika koa rehefa miverina tokoa isika amin'Andriamanitra. Miombona amin'i Kristy ka zary zava-boahary vaovao araky ny fampianaran'i Md Paoly ao amin'ny vakiteny faharoa *“ka hampitovy endrika azy amin'ny Vatany be voninahitra, araka ny herin'ny fahefana nampanekeny azy ny zavatra rehetra”* Raha miombona amin'i Jesoa tokoa isika amin'izao Ady sady Dia ataontsika mankany amin'ny Paka izao, Ady amin'ny ratsy izao dia hiova tokoa isika ka hampitovin'i Jesoa endrika aminy izany hoe tonga zanak'Andriamanitra isika. Raha zanak'Andriamanitra araky ny hafatry ny Papa amin'ny karemy isika dia hiezaka tokoa eo amin'ny fiainantsika andavan'andro hanana izany fibebahana ara-ekolojika izany eo anivon'ny fiainantsika ka hahatonga antsika hanorina tontolo iainana vaovao hanjakany fivelaran'ny tontolom-piainana izany dia ny zava-boaary.

Rehefa mivelatra araky ny maha izy azy ny zava-boahary dia io no hanampy antsika hiroso hanorina ny tontolom-piainana vaovao, vokatry ny fontsika vaovao mampanjaka ny marina isika, mampanjaka ny rariny sy ny hitsiny ka mivelona ny tena fifankatiavana marina dia hamirapiratra tahaka ny fiovan-

tarehin'i Jesoa ny tontolom-piainana ka hiroso amin'ny lalindalina kokoa amin'ny tontolom-pinoana izay hivelomantsika ny fifandraisantsika vaovao amin'Andriamanitra ka hanjaka eo anivontsika eo anivon'ny fianakaviana Eglizy kely eo anivon'ny fiaraha-monina, eo anivon'ny Eglizy Tranon'Andriamanitra izay maha Eglizy Olona Velona antsika izany.

Ry Jesoa Tompo ô, mankasitraka sy mankatelina anao izahay amin'izao Alahady faharoa ny karemy izay nanehoanao ny fiovan-tarehy izay taratry ny hiseho aminay rehefa tanteraka tokoa ny tena fiovam-penitra mahery vaika eo amin'ny fiainanay sady andraisanay koa ny vokatry ny fanavotanao amin'izao firosoana amin'ny Paka izao. Ambaranao fa tsy ny làlan'ny hazo fijaliana no tanjona fa ny fitsanganan-ko velona raha manatanteraka izay Ady amin'ny ratsy izahay sy mamakivaky izao karemy izao miaraka aminao ka tanteraka soa amantsara ao amin'izay fankalazana ny Paka izay izahay dia hiova tokoa ka ho zary olom-baovao ao aminao, zary zava-boahary vaovao midera sy mankalaza ny fitiavanao sy ny voninahitrao eo anivon'izao tontolo izao.

Ry Jesoa Tompo ô, Ampianaro izahay mba hahita ny voninahitrao eo amin'ny fiainanay, ampianaro izahay araky ny ambaran'Andriamanitra Ray "Ry zanako malalako, henoy izy" enga anie izahay hihaino anao tokoa amin'izao Ady sady Dia izao ka hiara-maty amin'ny fahotana izahay dia hiaraka hitsangana aminao ka ho zary Eglizy Olona Velona tokoa manorina Eglizy Tranon'Andriamanitra ilay tranobe iombonana izay hanjakan'ny rariny sy ny hitsiny, hanjakan'ny fifankatiavana sy fahamarinana, hitondra izany fiadanana avy aminao izany. Amen

Mompera Arsevka Benjamin Ramaroson